

lub suab hu, thiab yuav hnov Vajtswv lub raj lub suab nrov. Cais cov neeg tuag lawm uas ntseeg Yexus Khetos yuav sawv hauv qhovtuag los.

Tomqab ntawd Vajtswv yuav koj peb cov uas tseem ua neej nyob nrog cov neeg ntawd ua ke nrog huab nrog cua mus ntsib tus Tswv saum ib nta ntuj. Peb yuav nrog tus Tswv nyob mus ib txhis li.

Yog li ntawd nej cia li khaws zaj no cia, thiab ib leeg muab los ntuas ib leeg sawvdaws thiaj li yuav qab siab nyob. (1Thexalaunikes 4:15-18)

Txawm yog nej los, nej yuav tsum npaj rawv tos thiab, rau qhov lub sijhawm uas nej tsis nco qab ceevfaj, neeg Leejtub yuav los lub sijhawm ntawd ntag. (Mathais 24:44)

Peb yog neeg Ceebtsheej, peb niajnub ua siab ntev tos peb tus Cawmseej uas yuav los saum Ceebtsheej los. Tus ntawd yog peb tus Tswv Yexus Khetos. (Filipis 3:20)

Tej ntawd yuav puastsuaj mus tagrho, yog li ntawd nej yuav tsum koj nej lub neej zoo li cas? Tsimnyog nej koj nej lub neej kom zoo kawg nkaus thiab haum Vajtswv siab.

Nej yuav tsum niajnub tos hnuv uas Vajtswv txiav txim, thiab muab siab rau ua kom hnuv ntawd los txog sai. Hnuv ntawd yog hnuv uas lub ntuj yuav kubhnyiab tas, thiab hluavtaws yuav kub ib puas tsav yam uas nyob saum nruab ntug yaj tas huv tibi.

Tiamsis Vajtswv twb cog lus tseg lawm hais tias, yuav muaj lub Ceebtsheej thiab lub ntiajteb tshiab. Nyob hauv lub Ceebtsheej thiab lub ntiajteb tshiab uas peb niajnub tos muaj kev ncajnrees xwb.

Yog li ntawd cov kwvtij uas kuv hlub es, thaum nej tseem tabtom tos hnuv ntawd nej yuav tsum muab siab rau koj nej lub neej rau Vajtswv pom hais tias, nej yog cov neeg zoo kawg nkaus tsis muaj ib qho txhaum hlo li, thiab nej nrog Vajtswv sib haumxeeb. (2 Petus 3:11-14)

387

NTUJ CEEBTSHEEJ

Tomqab ntawd kuv rov ua yogtoog dua ib zaug, kuv pom rooj ntug Ceebtsheej twb qhib cia lawm. Lub suab uas thawj zaug kuv hnov hais nrov nrov rau kuv ib yam li lub suab raj, nimno kuv rov qab hnov hais rau kuv hais tias, koj cia li tuaj saum no kuv yuav muab tej uas yav tomntej no yuav tshwmsim los rau koj saib.

Tamsim ntawd Vajtswv tus Ntsujplig los tshoov kuv lub siab, kuv txawm pom muaj ib lub rooj zaum nyob saum ntuj Ceebtsheej, thiab muaj ib tug zaum saum lub rooj ntawd.

Nws lub ntsejmuag ci ib yam li tej hlaws dajdub, thiab lub hlaws liabdub. Muaj ib tug zaj sawv vij lub rooj. Tus zaj ntawd ntsuab ib yam li tej hlaws ntsuab.